



Saksframlegg

Utval	Møtedato	Utvalsak
Plan- og miljøutvalet		
Kommunestyret		

Felles klimaplan for Vest-Telemark - mindre rullering av handlingsplanen

Vedlegg

- 1 Handlingsplan for Klimaplan i Vest-Telemark, 2025
- 2 Oppsummering og vurdering av innspel frå høyringa
- 3 Ungdomsrådet - Saksprotokoll 26.05.25, sak 12/25
- 4 Alle innspela til høyring og offentlig ettersyn
- 5 Saksframlegg i rådsmøte 14.10.25, sak 41/2025

Dokument i saka


[Klimaplan for Vest-Telemark, 2022](#)

Bakgrunn

Vinje kommune vedtok i 2022 ein felles klimaplan for Vest-Telemark saman med kommunane Tokke, Kviteseid, Seljord og Nissedal.

Klimaplanen tek for seg 7 tema:

- Arealforvaltning – *Ta vare på naturen gjennom berekraftig arealforvaltning*
- Jordbruk – *Auka verdiskaping og berekraftig jordbruk*
- Skogbruk – *Minimere avskoging og auke det totale opptaket av klimagassar*
- Sirkulærøkonomi og avfall – *Frå verdilaust til verdifullt*
- Transport – *Redusert klimagassutslepp frå transport*
- Innkjøp – *Redusert klimaavtrykk frå innkjøp*
- Enøk – *Redusere energibruk*



Det er satt ned ein gruppe på tvers av kommunane for å jobbe aktivt med gjennomføring av tiltaka for å nå måla i planen. Denne gruppa blir kalla klimaforum. Vinje kommune sin representant inn i denne gruppa er Anne-Sofie B. Strømme, plan- og miljørådgjevar.

Vest-Telemarkrådet vedtok i rådsmøte 04.02.25, sak 04/25, å starte opp arbeidet med å ei mindre rullering av handlingsdelen til klimaplanen for Vest-Telemark. Vest-Telemarkrådet er eit regionalt samarbeid mellom Fyresdal, Kviteseid, Nissedal, Seljord, Tokke og Vinje. I rådet møter ordførarane og kommunedirektørane dei seks kommunane. Vedtaket var fylgjande:

Sak 04/2025 vedtak:

- 1) Vest-Telemarkrådet vedtek å starte opp arbeidet med å revidere handlingsdelen i klimaplanen for Vest-Telemark i medhald av plan- og bygningslova § 11-12.*
- 2) Vest-Telemarkrådet og klimaforumet vil omarbeide handlingsdelen før han vert lagt ut på høyring og offentleg ettersyn.*
- 3) Høyringsperioden blir koordinert av Vest-Telemarkrådet, og innkomne høyringsinnspel vil bli samanfatta og vurdert av klimaforumet.*
- 4) Revidert handlingsplan vil etter høyring, kome opp som sak i Vest-Telemarkrådet og deretter i kvar av kommunane.*
- 5) Tiltaksdelen vert rullert 2. kvart år.*

Planstatus

Klimaplanen har status som kommunedelplan etter plan- og bygningslova § 11-1, og er vedteken i kvart kommunestyre i Vinje, Kviteseid, Tokke, Seljord og Nissedal. Planen er difor bindande som styringsverktøy for kommunane. Fyresdal kommune vedtok eigen handlingsdel i 2023, men vurderer no å gå inn i felles handlingsdel saman med dei andre kommunane i Vest-Telemark.

Prosess og medverknad

Det er gjennomført ei mindre rullering av handlingsdelen, med mål om å revidere, presisere og prioritere tiltaka. Kunnskapsgrunnlaget, satsingsområda og målsetjingane i klimaplanen er ikkje rullert i denne omgang.

Klimaforum varsla oppstart av mindre rullering av handlingsplanen for klimaplanen med frist for innspel 25.04.25. Det kom inn eit innspel innan fristen.

Ungdomsrådet i Vinje kommune fekk høve til å kome med innspel til planarbeidet i møte 26.05.25, sak 12/25, vedlegg 3. Vedtaket i ungdomsrådet var fylgjande:

Vedtak

Ungdomsrådet har fylgjande innspel til planarbeidet med revidering av klimaplan for Vest-Telemark:

- Forbetre og likestille kollektivtransport-tilbodet i distrikta.
- Egne informasjonsmøte retta mot ungdom.
- Tilgjengeleg informasjon skal tilpassast ungdom som målgruppe.

Ungdomsråd i andre kommunar har også kome med innspel til planarbeidet. Desse innspela er teke med og vurdert av klimaforum før den vart sendt på høyring og offentleg ettersyn.

Klimaforum har etter varsel om oppstart redusert talet på tiltak frå 59 til 35. Endringane inkluderer:

- Prioritering og fjerning av nokre tiltak frå kvart temaområde
- Fjerning av vage formuleringar
- Samanslåing av tiltak
- Fjerning av lovpålagde krav
- Fjerning av tiltak som er gjennomførte

Revidert handlingsplan har vore på intern høyring i kommuneadministrasjonane i mai og juni 2025, og den vart sendt ut på offentleg høyring 02.07.25, med frist for innspel 19.09.25. Høyringa vart kunngjort i Vest-Telemark blad, på kommunane og Vest-Telemarkrådet sine heimesider og Facebook-sider, samt i Friskus-appen. Varsel om høyring vart sendt på e-post til relevante aktørar, inkludert Statsforvaltaren, Fylkeskommunen, Renovest, IATA, Bondelaget, Bonde- og småbrukarlaget, skogeigarlaga og Naturvernforbundet.

Anne-Sofie Bergene Strømme, plan- og miljørådgjevar i Vinje kommune, har teke imot høyringssvar og formidla desse vidare til klimaforum. Det har kome inn 7 høyringsfråsegn innan høyringsfristen, innspela ligg i sin heilskap i vedlegg 4. Innspela er gjennomgått av og vurdert av klimaforum, sjå vedlegg 2.

Vurdering

Det er ikkje sett målbare mål for enkeltståande tiltak i denne rulleringa. Dette bør vurderast ved ei full rullering, der ein også må greie ut korleis måling skal skje med tanke på referanseår, indikatorar og tilgjengelege data.

Ei oversikt over gjennomførte tiltak frå 2022-2025 er inkludert i handlingsdelen, for å syne kva kommunane og klimaforum har arbeidd med etter at planen vart vedteke i 2022. Det er lagt opp til at kvar kommune står fritt til å prioritere tiltak etter lokale behov og kapasitet. Klimaforum skal bidra til felles gjennomføring, kunnskapsdeling og kompetanseheving på tvers av kommunane.

Frå oppstartsdokumenta for klimaplanen heiter det:

«Det er viktig å oppretthalde engasjementet og viljen til å sette tiltaka ut i livet. Det vert difor foreslått å nedsette eit forum/utval beståande av ein representant frå kvar kommune og der Vest-Telemarkrådet er sekretariat. Mandatet til eit slikt klimaforum vil vera å prioritere, initiere og gjennomføre/koordinere tiltak i handlingsdelen».

Klimaforumet inviterer inn fagpersonar frå kommunane og ekstern bistand utifrå ut frå behov og satsingsområde. Vest-Telemarkrådet er ansvarleg for å organisere møta i klimaforumet og trygge framdrift i koordinering og iverksetting av tiltak.

Rådsmøte 14.10.25, sak 41/2025

Rådet vedtok handlingsplanen slik den låg føre, men noko justering på transport. Vedtaket i rådsmøte 14.10.25 er fylgjande:

Vedtak: *Vest-Telemarkrådet rår kommunestyra til å vedta handlingsdelen i klimaplanen med følgjande endringar:*

1. *Legg til eit tiltak om å: Redusere bilbruk og styrke lokal mobilitet gjennom deling av privat transport. Undersøkje moglegheiter for å ta i bruk samkøyringsapp i Vest-Telemark.*
2. *Endre tiltak om informasjon om kollektivtransport til: Styrke og synleggjere eksisterande kollektivtransporttilbod i Vest-Telemark. Samarbeide med Fylkeskommunen om ein kampanje for å betre kollektivtilbodet i distrikta.*

Klimaforum har revidert handlingsplanen i tråd med vedtaket frå rådsmøte. Endeleg handlingsplan til klimaplanen ligg i vedlegg 1. Kommunedirektøren rår til å vedtak handlingsplanen i klimaplanen slik den ligg føre med dei endringane som er vedteke i rådsmøte 14.10.25.

Kommunedirektøren sitt framlegg til vedtak

Vinje kommune vedtek handlingsplanen i klimaplan for Vest-Telemark, i medhald av plan- og bygningslova § 11-15, slik den ligg føre med dei endringane som er vedteke i rådsmøte 14.10.25, sak 41/2025.